

lacus aggressis, allatæ, decidebant in victoris caput, sicut aquæ, e nubibus ortæ, in *Vindhya* cacumen.

9. Qui jam eremitæ veste indutus eximie conspicuus fuerat, in eo, cum ornatum regium induisset, splendor oriebatur, quasi iterationis vitio affectus.

10. Ille cum militibus, qui consiliariis, *Rákshasis*, simiisque mixti erant, et cum civibus, instrumentorum sono delectatis, ingressus est regiam stirpis suæ urbem, altis portis instructam, e cujus ædibus grana humectata ei obviam jaciebantur.

11. In curru stans, dum flabella leviter movebantur a SUMITRIDA ejusque fratre minore, dumque umbella a BHARATA tenebatur, erat veluti subsidiorum collectio, corpore induta.

12. Fumi, ex agallocho in ædibus incenso procedentis series, venti violentia divisa, apparebat velut urbis illius capillorum plexus, ab ipso RÁMA, e sylva reverso, solutus.

13. RAGHUIDARUM herois uxorem, a socris vestibulis pulcherrimis indutam, in lectica sedentem, *Ayodhya* urbis mulieres salutabant manibus, quæ junctæ in ædium fenestris conspiciebantur.

14. Illa, perfusa unguento perenni, micantem splendoris orbem fundente, ab ANUSÚYA dato, a marito urbi suæ tanquam pura monstrata, denuo splendebat, ac si ignem ingressa fuisset.

15. RÁMAS, amicitiae plenus, postquam amicis suis domicilia omnibus commodis instructa dedisset, lacrymas fundens ingressus est patris, sola effigie superstitis, ædes honoribus adornatas.

16. BHARATÆ matris dolorem removit, junctis manibus sic eam alloquens: "Quod, O mater, patrem nostrum haud deflectere passa es a veritate, cujus fructus cælum est, hoc considerate a te factum est."

17. Atque tum SUGRÍVÆ, VIBHÍSHANÆ et reliquis tantos honores aptos obtulit, ut, quamquam illi sola cogitatione omnia efficere valebant, tamen animus eorum stupore impleretur.

18. Deinde eremitas divinos, reverentiæ caussa aggressos, veneratus, ab his recitatum audiebat hostis occisi originem et vitam, qui ipsius robori majorem etiam tribuebant gravitatem.